

# Mendalami penulisan berita, rencana

PERIBAHASA Melayu ada berkata jika tidak dipecahkan ruyung manakan dapat sagunya. Maksudnya kejayaan tidak akan datang tanpa usaha.

Sehubungan itu Bahagian Hal Ehwal Pelajar (BHEP) Universiti Sains Islam Malaysia (USIM) telah menghimpunkan barisan penceramah yang berpengalaman luas dalam penyiaran baru-baru pada Bengkel Penyiaran Media USIM 2011.

Bengkel anjuran Unit Kebudayaan BHEP dengan kerjasama Urus Setia Kesenian Pelajar USIM itu bertujuan memberi peluang kepada pelajar dan kakitangan BHEP mendalami bidang penyiaran khususnya segmen berita dan rencana.

Kehadiran penceramah yang berwibawa daripada agensi media cetak dan elektronik mendedahkan kepada peserta mengenai dunia penyiaran hari ini.

Menurut Ketua BHEP USIM, Nasrul Hakim Ahmad, Objektif program itu ialah memperkasakan gaya penulisan berita dan rencana di samping pengetahuan dalam bidang multimedia serta langkah promosi melibatkan aktiviti pelajar di universiti.

Kata beliau, penulisan berita, rencana dan elektronik yang baik dan tepat dilihat dapat membantu menghebahkan perkembangan universiti kepada masyarakat luar dengan berkesan.

“Saya berharap penganjuran bengkel itu dapat membantu warga USIM dalam menghasilkan penulisan yang lebih baik dan berkesan kepada masyarakat.

“Bengkel seumpama ini dapat memberi panduan kepada peserta untuk menulis bagi menyebarkan maklumat mengenai universiti kepada orang ramai,” katanya.

Bengkel sehari itu dihadiri 35 peserta yang terdiri daripada pelajar, kakitangan dan pegawai USIM.

Nasrul Hakim berkata, para peserta juga didedahkan dengan penerbitan media cetak dan elektronik.

Selain itu mereka juga diberi penerangan fotografi dan multimedia.